

Na osnovu člana 67. PRAVILA JU "KULTURNO SPORTSKI CENTAR I RADIO ILIJAŠ" (u daljem tekstu JU "KSC I RADIO ILIJAŠ"), broj: OPU-IP br.509/2010 od 15.11.2010.godine, a u vezi sa Zaključkom Općinskog vijeća broj:01/1-02-2065-3-2/13 od 28.11.2013.godine Upravni odbor JU "KSC I RADIO ILIJAŠ", na prijedlog Direktora, na 17. sjednici održanoj 29.05.2014. godine, d o n o s i:

P R A V I L N I K
o načinu korištenja resursa JU "KSC I RADIO ILIJAŠ" i raspodjeli termina za udruženja iz oblasti sporta i kulture

Član 1.

U skladu sa Zaključkom Općinskog vijeća Ilijaš JU "KSC I RADIO ILIJAŠ" koja je nadležna za prostorni kapacitet i izdavanje termina će obezbjediti neophodan broj termina za trenažni i takmičarski proces u sportskoj dvorani, u skladu sa prostornim, organizacionim i tehničkim mogućnostima, klubovima registrovanim na području Općine Ilijaš po sljedećim kriterijima i prioritetima:

- sportski klubovi iz reda dvoranskih sportova,
- rang takmičenja u skladu sa uzrasnim kategorijama,
- broj uzrasno-takmičarskih kategorija,
- broj članova takmičarskih selekcija,
- referense (uspjesi i rezultati)

Član 2.

2.1. Sportska udruženja sa područja Općine Ilijaš u odnosu na ostale korisničke grupe imaju pravo prvenstva prilikom utvrđivanja termina trenažnog i takmičarskog procesa u sportskoj dvorani koji odgovaraju njihovim organizacionim potrebama, u dnevnim i večernjim satima.

Dnevni termin podrazumijeva vrijeme od 8,00 do 17,00 sati.

Večernji termin podrazumijeva vrijeme od 17,00 do 20,00 sati.

Večernji termini poslije 20,00 sati su komercijalnog karaktera.

2.2. Takmičarski ciklus se mora odvijati u skladu sa rasporedom takmičenja verifikovanim od strane nadležnog sportskog saveza.

2.3. Klubovi će odmah po dobijanju rasporeda takmičenja isti dostaviti JU "KSC I RADIO ILIJAŠ", a najkasnije u roku od 15 dana prije početka takmičenja za predstojeću sezonu.

2.4. Za prijateljska, revijalna i takmičenja koja nisu pod vodstvom strukovnih saveza JU "KSC I RADIO ILIJAŠ" će pokušati iznaći mogućnost obezbjeđivanja termina pod uslovom da se ista pisanim zahtjevom obrate do 25.-og u mjesecu za naredni mjesec.

2.5. Prednost korištenja resursa JU "KSC I RADIO ILIJAŠ" imaju reprezentativne selekcije u odnosu na takmičarsko-trenažne potrebe ilijaških sportskih klubova.

2.6. U rasporedu termina prednost imaju takmičenja u odnosu na trenažni proces.

Član 3.

3.1. U zvaničnom takmičarskom procesu prioriteti su po sljedećem rasporedu:

- Takmičenje reprezentativnih selekcija;
- Međunarodna klupska takmičenja;

- Takmičenja u organizaciji ili suorganizaciji Općine Ilijaš;
- Takmičenja prvih timova po jačini ranga takmičenja, gdje prioritet imaju klubovi koji se takmiče u višem u odnosu na niži rang takmičenja, po procentima bit će podijeljen između klubova i to tako da klub iz nižeg ranga takmičenja ima za 25% manje večernjih i za 20% manje dnevnih termina od klubova iz višeg ranga takmičenja;
- Takmičenja mlađih selekcija u skladu sa nivoom takmičenja i kategorijama selekcije, gdje prioritet imaju klubovi koji se takmiče u višem u odnosu na niži rang takmičenja, za svaki klub za mlađe selekcije do tri termina u jutarnjim satima (do 12,00 sati) i do tri termina u popodnevnim satima (do 17,00 sati) radnim danima;
- Turnirska takmičenja, zavisno od kvaliteta i kontinuiteta samog turnira;
- Prijateljska takmičenja;
- Ostala takmičenja.

3.2. Uslov za dobijanje termina za takmičarski proces, je zvanična potvrda (kalendar) takmičenja strukovnih saveza.

Član 4.

U skladu sa stavovima 4. i 5. člana 3. ovog Pravilnika, klubovi će imati mogućnost povećanja broja termina za trenažni proces ukoliko imaju dvije ili više takmičarskih grupa po selekciji.

Član 5.

Trenažno-takmičarski proces će se obavljati u terminima koji se utvrđuju mjesečnim rasporedima korištenja resursa koje u ime JU "KSC I RADIO ILIJAŠ" sačinjava odgovorna osoba zadužena za planiranje termina.

Resursi JU "KSC I RADIO ILIJAŠ" koje koriste klubovi iz Člana 1. ovog Pravilnika su prostorno-infrastrukturni i tehnički kapaciteti, koristit će se prvenstveno u skladu sa finansijskim mogućnostima kojim raspolaže JU "KSC I RADIO ILIJAŠ", a propisani su i kao obavezna pravilima takmičenja strukovnih saveza.

5.1. Pod prostorno-infrastrukturnim resursima se podrazumijeva:

1. Sportska dvorana

- a.) Velika sala Sportske dvorane (glavna ploha);
- b.) Fitness sala;
- c.) Svlačionice;
- d.) Press sala;

2. Kino sala

- a.) Slobodni prostori kino sale;

5.2. Pod tehničkim resursima se podrazumijevaju:

Trenutno raspoloživa tehničko-sportska oprema za održavanje trenažno-takmičarskog procesa (sportski rekviziti/koševi, golovi, stubovi za odbojku, strunjače, mreže/, rasvjeta, stolovi, stolice, semafor i razglas).

SPORTSKA DVORANA

a.) GLAVNA PLOHA

Član 6.

Korištenje termina na osnovi ovih kriterija imaju takmičarske selekcije – dvoranski sportovi.

6.1. Prednost, u odnosu na ostale dvoranske sportske klubove imaju:

- Dvoranski kolektivni sportovi (kojima je uslov velika sala za održavanje takmičenja), (košarka, rukomet, odbojka i mali nogomet)

6.2. Prioritet kada su u pitanju klubovi iz stava 6.1. ostvaruje se na osnovu:

- Rang takmičenja;
- Broj uzrasno takmičarskih kategorija;
- Broj članova takmičarskih selekcija,
- Referense (uspjesi i rezultati)

6.3. Termini korištenja velike sale bit će podijeljeni na način da dnevni termini radnim danima u procentu od 50% termina koriste klubovi za trenažni proces, a 50% termina koristi JU "KSC I RADIO ILIJAŠ". U periodu večernjeg termina radnim danima u procentu 60% termina koristi JU "KSC I RADIO ILIJAŠ", a 40% termina klubovi za trenažni proces.

U zimskom periodu, ukoliko to prostorne, organizacione i tehničke mogućnosti budu dozvoljavale JU "KSC I RADIO ILIJAŠ" će i ostalim nedvoranskim sportovima dati termine za trenažni proces, ovaj stav se odnosi na dnevne termine (termine od 08,00 do 17,00 sati).

6.4. U trenažnom procesu prioriteta su po sljedećem rasporedu:

- Trenažni proces reprezentativnih selekcija u skladu sa kategorijom selekcije,
- Trenažni proces prvih timova ilijaških klubova u zavisnosti od jačine ranga takmičenja,
- Projekti JU "KSC I RADIO ILIJAŠ",
- Trenažni proces mlađih selekcija u skladu sa brojem selekcija i brojem članova,
- Trenažni proces netakmičarskih selekcija (škola),
- Trenažni proces vandvoranskih sportova.

b.) FITNESS SALA

Član 7.

Korištenje termina na osnovi ovih kriterija imaju takmičarske selekcije – dvoranski sportovi.

7.1. Prednost, u odnosu na ostale dvoranske sportske klubove, imaju klubovi koji spadaju u stonoteniserske, borilačke i gimnastičke sportove.

7.2. Prioritet kada su u pitanju klubovi iz stava 7.1. ostvaruje se na osnovu:

- Rang takmičenja,
- Broj uzrasno takmičarskih kategorija,
- Broj članova takmičarskih selekcija,
- Referense (uspjesi i rezultati)

7.3. Termini korištenja fitness sale bit će podijeljeni na način da dnevni termini radnim danima u procentu od 50% termina koriste klubovi za trenažni proces, a 50% termina koristi JU "KSC I RADIO ILIJAŠ". U periodu večernjeg termina radnim danima u procentu 50% termina koristi JU "KSC I RADIO ILIJAŠ", a 50% termina klubovi za trenažni proces.

7.4. U trenažnom procesu prioritet imaju:

- Trenažni proces reprezentativnih selekcija u skladu sa kategorijama selekcije,
- Trenažni proces prvih timova ilijaških klubova u zavisnosti od jačine ranga takmičenja,
- Projekti JU "KSC I RADIO ILIJAŠ"
- Trenažni proces mlađih selekcija u skladu sa brojem selekcija i brojem članova,
- Trenažni proces netakmičarskih selekcija (škola),
- Trenažni proces vandvoranskih sportova.

c.) SVLAČIONICE

Član 8.

8.1. U toku trenažnog procesa svlačionice će se dodjeljivati u skladu sa u tom momentu, trenutnim mogućnostima JU "KSC I RADIO ILIJAŠ", izuzev svlačionice namjenjene za sudije. Svaki klub za svoj trenažni proces ima pravo na jednu svlačionicu.

8.2. U toku takmičarskog procesa svlačionice će se dodjeljivati u skladu sa pravilima – propozicijama same sportske asocijacije koje je klub organizator takmičenja član i koje nalažu obzirom na broj učesnika (ekipa) određen broj svlačionica.

d.) PRESS SALA

Član 9.

Svaki klub, koji je registrovan na području Općine Ilijaš ima pravo da koristi prostor Press sale za potrebe održavanja sastanaka, skupštine, takmičenja kao i za druge potrebe koje su od bitnog značaja za sam klub, uz prethodan pismeni zahtjev od 3 dana prije održavanja istog, a JU "KSC I RADIO ILIJAŠ" će u skladu sa mogućnostima i odobriti isto, vodeći se po prioritetima iz člana 2. ovog Pravilnika.

KINO SALA

a.) SLOBODNI PROSTORI KINO SALE

Član 10.

Korištenje slobodnog prostora kino-sale će se dodjeljivati u skladu sa odlukom o korištenju.

OSTALE ODREDBE

Član 11.

Sportska i kulturna udruženja koja su tek osnovana ne ulaze u kategoriju korisnika pod povoljnim uslovima prve godine postojanja.

Član 12.

Radi adekvatne realizacije ovih kriterija klubovi su obavezni prije početka takmičarskog perioda dostaviti JU "KSC I RADIO ILIJAŠ" validan dokaz o učešću u ligama kao i broj selekcija koje učestvuju u takmičarskom procesu.

Član 13.

U slučaju nanošenja štete ili uništavanja imovine JU "KSC I RADIO ILIJAŠ" od strane korisnika, isti su dužni namiriti troškove nastale nanošenjem štete. U protivnom će im se obustaviti korištenje termina sve do namirenja štete.

Član 14.

Prednost u rezervaciji termina za trenažni proces preko utvrđenih termina ovim Pravilnikom imaju ilijaški klubovi, u odnosu na rekreativce i druge klubove uz mogućnost odobravanja rabata do 50%.

Član 15.

U iznimnim i vanrednim situacijama koje zahtjevaju angažman resursa JU "KSC I RADIO ILIJAŠ", koje nisu mogli biti predviđeni mjesečnim planom, a JU "KSC I RADIO ILIJAŠ" procjenjuje da se radi o projektima od šireg društvenog značaja, ranije utvrđeni termini se mogu promijeniti ili

otkazati.

Član 16.

U slučaju da se istovremeno održava više trenažnih ili takmičarskih procesa koji ometaju jedan drugi, bilo audio ili vizualno, rukovodstvo JU "KSC I RADIO ILIJAŠ" donosi konačnu odluku.

Član 17.

Ovaj Pravilnik primjenjivat će se od 01.06.2014. godine

Broj: 01-I-05-P/2014
Ilijaš, 29.05.2014.godine

Predsjednik Upravnog odbora

Tarik Omerhodžić